

KERATAN AKHBAR

TARIKH : 29 JUN 2023
AKHBAR : BERITA HARIAN
MUKA SURAT : 23

'Gaji, pendapatan rakyat meningkat secara berkala'



'Gaji, pendapatan rakyat meningkat secara berkala'

Kerajaan fokus dasar pastikan pertumbuhan lebih sekata, inklusif

Oleh Mahanum Abdul Aziz
mahanum_aziz@bh.com.my

Kerajaan akan berusaha memastikan gaji dan pendapatan rakyat naik secara berkala, setimpal dengan kenaikan kos sara hidup, kata Menteri Ekonomi, Rafizi Ramli.

Beliau berkata, fokus kementerian ialah membangunkan kerangka Dasar Gaji Progressif bersama-sama Kementerian Sumber Manusia untuk memastikan pertumbuhan gaji yang lebih sekata dan inklusif.

Katanya, dengan pertumbuhan gaji yang lebih sekata dan inklusif, seterusnya mendorong kepada gaji dan pendapatan yang lebih baik kepada semua pekerja terutamanya golongan muda.

"Kertas dasar mengenai Dasar Gaji Progressif akan dibentangkan kepada Majlis Tindakan Ekonomi

Negara (MTEN) pada Ogos ini untuk mendapat panduan dari kepimpinan negara.

"Ini kali pertama dalam sejarah negara mana-mana pentadbiran mengusahakan satu kerangka dasar khusus mengenai pertumbuhan gaji yang sekata dan inklusif kepada semua pekerja," katanya pada sidang media mengenai Indeks Harga Pengguna (IHP) bagi Mei 2023 di Putrajaya, semalam.

Rafizi berkata, fokus kepada pertumbuhan gaji juga akan menjadi tema utama perancangan ekonomi negara di bawah Rancangan Malaysia yang akan datang.

Beliau berkata, strategi itu dijangka akan membantu menangani kos sara hidup rakyat melalui penyelesaian kukuh yang berkekalan.

Sementara itu, Rafizi berkata, kadar inflasi 2.8 peratus yang dicatatkan pada Mei 2023 mencerminkan trend harga yang semakin stabil berterusan.

Beliau berkata, berdasarkan perangkaan dan unjuran sedia ada serta mengambil kira keadaan makro dan global, pihaknya berharap trend penurunan inflasi itu berterusan.

Katanya, jika trend peningkatan harga semakin

reda dan terus turun, diharapkan menjelang Ogos dan September ini harga barang yang dicatatkan pada bulan itu akan sama seperti tahun lalu.

"Sasaran kerajaan adalah memastikan kestabilan harga. Apabila inflasinya sudah berada dalam lingkungan 2 hingga 2.5 peratus, maksudnya dari setahun ke setahun, harga itu naik sedikit saja dan hampir sama dengan tahun lalu. Insya Allah kita ke arah itu," katanya.

Kadar inflasi negara pada Mei 2023 terus reda kepada 2.8 peratus berbanding 3.3 peratus pada April 2023, mencatat penurunan sembulan bulan berturut-turut.

Kadar inflasi yang dicatatkan pada bulan lalu itu juga adalah terendah dalam setahun.

Mengulas lanjut, Rafizi berkata, penurunan inflasi bagi Mei 2023

juga menunjukkan kejatuhan menyeluruh merentas semua kategori perbelanjaan, menandakan penstabilan harga secara menyeluruh.

Beliau berkata, kadar inflasi yang stabil adalah kunci kepada pertumbuhan ekonomi yang mampan agar ekonomi negara terus berkembang tanpa menyebabkan permintaan yang mendadak sehingga harga barang dan perkhidmatan tidak melonjak berterusan sampai tidak terkawal.

Inflasi stabil

Katanya, penstabilan harga melalui penurunan inflasi yang menyeluruh dan berterusan adalah sebahagian dari strategi menyeluruh kerajaan menangani kos sara hidup rakyat agar tidak membebankan.

Mengenai pengumuman Bank Negara Malaysia (BNM) akan cam-

pur tangan dalam pasaran pertukaran asing bagi membanding pergerakan mata wang yang dianggap keterlambatan, Rafizi berkata, terdapat pelbagai campur tangan oleh bank pusat yang mana ada antaranya adalah secara langsung.

Beliau berkata, konteks campur tangan BNM lebih kepada memantau pergerakan sama ada tunai dibawa pulang kembali ke Malaysia oleh pengekspatriot.

Katanya, adalah menjadi rutin bagi BNM yang sentiasa mengikuti aliran keluar masuk wang ke dalam negara.

Dalam perkembangan lain, Rafizi berkata, Kementerian Ekonomi akan mengumumkan projek pertanian dan pemakanan membabitkan 1,000 ekar pertama di seluruh negara di bawah Inisiatif Usaha Tani (INTAN) yang dikendalikan sebagai satu daripada program Inisiatif Pendapatan Rakyat (IPR), bulan depan.

Beliau berkata, projek untuk 1,000 ekar pertama itu sudah mengenal pasti rakan strategik dalam kalangan agensi pertanian kerajaan dan agensi-agensi Kerajaan Negeri yang akan mengusahakannya.

Katanya, kira-kira 4,000 peserta di bawah INTAN dijangka menerima plot tanah seluas kira-kira suku atau setengah ekar setiap seorang.

Ini kali pertama dalam sejarah negara mana-mana pentadbiran mengusahakan satu kerangka dasar khusus mengenai pertumbuhan gaji yang sekata dan inklusif kepada semua pekerja



Rafizi Ramli,
Menteri Ekonomi